

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 102354 24 K
Visoko, 20.11.2024. godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog S.T. sina M. iz V., zbog krivičnog djela nasilje u porodici iz člana 222. stav 2. u vezi sa stavom 1. KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0056903 24 od 15.05.2024. godine, na pretresu za izricanje krivično pravne sankcije održanom u prisustvu Kantonalnog tužitelja i optuženog S.T., dana 20.11.2024. godine, donio je i javno objavio:

P R E S U D U

OPTUŽENI: S.T. sin M. i majke N. rođena H., rođen ... godine u V., gdje je i nastanjen u ulici P.M. O.-..., pismen, sa završenom srednjom školom, po zanimanju vozač MV, zaposlen Rudnik Vareš- Adriatic Metals, u vanbračnoj zajednici, otac mladb. djeteta, po narodnosti Bošnjak, državljanin BiH, JMB ..., neosuđivan,

K r i v j e

što je:

dana 16.12.2023. godine oko 03:50 sati u Varešu, nasiljem, drskim i bezobzirnim ponašanjem ugrozio mir, psihičko i fizičko zdravlje svoje vanbračne supruge A.B. na način da je, u alkoholiziranom stanju, u porodičnom stanu koji se nalazi u stambenoj zgradi O... u ulici P.M., prvo verbalno vrijeđao istu govoreći joj da je smeće, zatim je gurnuo sa kreveta, udario je nogom u njezinu nogu, zatim u leđa od kojih udaraca je A. pala sa kreveta, govoreći joj da je kurva, psovao joj majku i sestre, iako je bio svjestan da ovakvim nasiljem, drskim i bezobzirnim ponašanjem ugrožava spokojstvo, duševno i fizičko zdravlje svoje supruge, što je i htio, što je sve kod A.B. izazvalo osjećaj straha i nesigurnosti,

dakle, nasiljem, drskim i bezobzirnim ponašanjem ugrozio mir, psihičko i fizičko zdravlje člana svoje porodice sa kojim živi u zajedničkom kućanstvu,

čime je počinio krivično djelo nasilje u porodici iz člana 222. stav 2. u vezi sa stavom 1. KZ FBiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH,

i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 4 (četiri) mjeseca, a koja se neće izvršiti ako optuženi za vrijeme od 1 (jedne) godine od dana pravosnažnosti presude, ne počinii novo krivično djelo.

Na osnovu čl.212 st.3 ZKP FBiH oštećena A.B. se sa imovinsko pravnim zahtjevom upućuje na parnični postupak.

Na osnovu člana 202. stav 1. u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0056903 24 od 15.05.2024.godine, optužilo je S.T. sina M. iz V., zbog krivičnog djela nasilje u porodici iz člana 222. stav 2. u vezi sa stavom 1. KZ FBiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 20.05.2024.godine. Na ročištu o izjašnjenju o krivnji dana 25.10.2024.godine, optuženi S.T. je izjavio da je kriv za krivično djelo nasilje u porodici iz člana 222. stav 2. u vezi sa stavom 1. KZ FBiH.

Na ročištu o razmatranju izjave o priznanju krivnje dana 20.11.2024.godine, sud se uvjerio da je optuženi S.T. izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi S.T. počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predložene dokaze i to : zapisnik o saslušanju svjedoka oštećena A.B., kći E. iz V., T.O.,- B.Z., sin D. iz V., policijski službenik PS Vareš, uvid u: alkotest na ime S.T. od 16.12.2023. godine, nalaz i mišljenje ljekara specijaliste JU Dom zdravlja Vareš broj 4028/23 od 16.12.2023. godine na ime A.B., rješenje Općinskog suda u Visokom broj: 41 0 Pr 100261 23 Zm od 16.12.2023. godine i izvod iz kaznene evidencije za osumnjičenog S.T. PS Vareš broj od 18.01.2024. godine.

Naime, priznanjem optuženog koje je u potpunosti i u skladu sa predloženim dokazima, nesporno je dokazano da je isti počinio krivično djelo koja mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglasio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom S.T. u kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je

u mnogome doprinio utvrđivanju činjeničnog stanja i skraćanju krivičnog postupka, iskreno kajanje, da se pomirio sa suprugom, kao i činjenicu da nije osuđivan.

Cijeneći utvrđene okolnosti na strani optuženog, sud je optuženom izrekao uvjetnu osudu kojom se optuženom S.T. u utvrđuje kazna zatvora u trajanju od 4 (četiri) mjeseca, koja kazna se neće izvršiti ako optuženi u roku od 1 (jedne) godine ne počini novo krivično djelo, u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu čl.212 st.3 ZKP FBiH sud je oštećenu A.B. se sa imovinsko pravnim zahtjevom uputio na parnični postupak.

Na osnovu člana 202 stav 1. u vezi sa članom 199. stav 2. tačka g) ZKP FBiH, sud je obavezao optuženog da plati sudu na ime troškova krivičnog postupka u vidu paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Sudija
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.